



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԳՆՈՒՄՆԵՐԻ ԲՈՂՈՔԱՐԿՄԱՆ ԽՈՐՀՈՒՐԴ

ք. Երևան

25.08.2017թ.

Ո Ր Ո Շ ՈՒ Մ

ՀՀ գնումների բողոքարկման խորհրդի թիվ ՍՑ-ԷՍ-2017/13-1

ՀՀ գնումների բողոքարկման խորհուրդը (այսուհետ նաև՝ Խորհուրդ) ուսումնասիրելով ՀՀ ֆինանսների նախարարության կողմից 15.06.2017թ. թիվ 03/26-1/10810-17 գրությամբ «Ֆիրմա Լիդա» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված պաշտոնական ընթացակարգով (այսուհետ՝ նաև պաշտոնական ընթացակարգ) ներկայացված հիմքերը, պարզեց հետևյալը.

1. ՀՀ ֆինանսների նախարարության ներկայացրած փաստերը և պահանջը.

ՀՀ ֆինանսների նախարարությունը, ՀՀ պաշտպանության նախարարության (այսուհետ նաև՝ Պատվիրատու) 07.06.2017թ. թիվ ԴՎԱ/1708 գրության հիման վրա, 15.06.2017թ. թիվ 03/26-1/10810-17 գրությամբ Խորհրդում նախաձեռնել է «Ֆիրմա Լիդա» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում (այսուհետ նաև՝ Ցուցակ) ներառելու նպատակով նախաձեռնված պաշտոնական ընթացակարգ:

2. ՀՀ պաշտպանության նախարարության կողմից ներկայացված փաստարկները և դիրքորոշումը.

ՀՀ պաշտպանության նախարարության նյութատեխնիկական ապահովման դեպարտամենտը 07.06.2017թ. թիվ ԴՎԱ/1708 գրությամբ դիմել է ՀՀ ֆինանսների նախարարությանը՝ հայտնելով հետևյալը.

«ԳԱԿ-ՇՀԱՊՁԲ-15/10-ՀՀ ՊՆ ՆՏԱԴ-ՇՀԱՊՁԲ-7/63» ծածկագրով շրջանակային համաձայնագրերի միջոցով գնման ընթացակարգին գնային առաջարկ է ներկայացրել թվով երկու մասնակից՝ «Ֆիրմա Լիդա» ՍՊԸ-ն և անհատ ձեռնարկատեր Աշոտ Ազատի Ազիզյան:

Քանի որ անհատ ձեռնարկատեր Աշոտ Ազատի Ազիզյանի հայտի մերժման արդյունքում ընթացակարգի 5-րդ չափաբաժնի մասով հաջորդ տեղ զբաղեցնող «Ֆիրմա Լիդա» ՍՊԸ-ի «ֆինանսական միջոցների առկայություն» չափանիշը չէր համապատասխանում հրավերի պահանջներին, մասնավորապես՝ ՀՀ կառավարության 10.02.2011թ. թիվ 168-Ն որոշմամբ հաստատված «Գնումների գործընթացի կազմակերպման» կարգի 48-րդ կետով նախատեսված ՀՀ ԿԱ պետական եկամուտների կոմիտեի տրված եզրակացության համաձայն «Ֆիրմա Լիդա» ՍՊԸ-ի համապատասխան հաշվետու տարվա ընթացքում պարտավորությունների հաշվեկշռային արժեքը գերազանցում էր ակտիվների հաշվեկշռային արժեքը, հանձնաժողովը որոշեց «Ֆիրմա Լիդա» ՍՊԸ-ի հայտը մերժել:»:

Խորհրդում նախաձեռնված պաշտոնական ընթացակարգի քննության նպատակով 20.06.2017թ. տեղի ունեցած նիստերին մասնակցում էր ՀՀ պաշտպանության նախարարության ներկայացուցիչներ՝ Անուշ Մաղաքյանը և Ալեքսան Կլազանցը:

3. «Ֆիրմա Լիդա» ՍՊԸ-ի ներկայացրած փաստարկները և դիրքորոշումը.

«Ֆիրմա Լիդա» ՍՊԸ-ն 23.06.2017թ. Խորհրդին ուղղված էլեկտրոնային գրությամբ հայտնել է հետևյալը.

Ընկերությունը 07.06.2017թ. ճշտված շահութահարկի հաշվարկ է ներկայացրել ՀՀ ԿԱ պետական եկամուտների կոմիտե՝ Մաշտոցի հարկային տեսչություն, որի ձև թիվ 6-ում պարզ երևում է, որ Ընկերության ակտիվները գերազանցում է պասիվներին:

Ընկերությունը նշել է, որ սխալն առաջացել է հետևյալ պատճառով՝ «Ընկերությունը 2016թ. նոյեմբերի 6-ին իր հերթական ժողովի նիստով ավելացրել է իր կանոնադրական կապիտալը՝ 35.000.000 ՀՀ դրամով, որը սխալմամբ չի արտացոլվել 2016թ. համար ներկայացված շահութահարկի հաշվարկի ձև 6-ում»:

Ընկերությունը հայտնել է, որ պատճառը կայացել է նրանում, որ Ընկերության կանոնադրական կապիտալի փոփոխությունը պետք է արտացոլվի ձև 6-ում, պետական ռեգիստրում համապատասխան փոփոխություն կատարելուց հետո, այնինչ ձև 6-ում փոփոխություն հատարելու համար դրա կարիքը չկար:

Ընկերությունը կից ներկայացրել է 07.06.2017թ. ՀՀ ԿԱ պետական եկամուտների կոմիտեի կողմից տեղեկանքով հաստատված շահութահարկի պատճենը և Ընկերության կանոնադրական կապիտալի ավելացման նպատակով հրավիրված ժողովի 06.11.2016թ. թիվ 5 արձանագրության պատճենը:

Խորհրդում տեղի ունեցած նիստերին մասնակցում էին Ընկերության տնօրեն Լիդա Սարգսյանը և հաշվապահ՝ Լյուդմիլա Զուլհալյանը:

4. ՍՑ-ԷՍ-2017/13-1 պաշտոնական ընթացակարգի քննության համար էական նշանակություն ունեցող փաստերը, խորհրդի հիմնավորումները և եզրահանգումը.

Խորհուրդն ուսումնասիրել է ՀՀ ֆինանսների նախարարության 15.06.2017թ. թիվ 03/26-1/10810-17 գրությունը, ՀՀ պաշտպանության նախարարության 07.06.2017թ. թիվ ԴՎԱ/1708 գրությունը և կից փաստաթղթերը, «ԳԱԿ-ՇՀԱՊՁԲ-15/10- ՀՀ ՊՆ ՆՏԱԴ-ՇՀԱՊՁԲ-7/63» ծածկագրով շրջանակային համաձայնագրերի միջոցով գնում կատարելու ընթացակարգի հրավերը (այսուհետ՝ Հրավեր), «ԳԱԿ-ՇՀԱՊՁԲ-15/10- ՀՀ ՊՆ ՆՏԱԴ-ՇՀԱՊՁԲ-7/63» ծածկագրով հայտարարված շրջանակային համաձայնագրերի միջոցով գնում կատարելու ընթացակարգի գնահատող հանձնաժողովի (այսուհետ՝ Նախ Հանձնաժողով) 29.05.2017թ. նիստի թիվ 4 արձանագրությունը, «Ֆիրմա Լիդա» ՍՊԸ-ի կողմից նշված ընթացակարգին ներկայացված մասնակցության հայտի պատճենը, Կոմիտեի կողմից 23.05.2017թ. տրված տեղեկանք-եզրակացությունը, Ընկերության 23.06.2017թ. գրությունը, ՀՀ ԿԱ պետական եկամուտների կողմից 17.08.2017թ. տրված տեղեկանքը:

ՀՀ պաշտպանության նախարարության հայտարարված «ԳԱԿ-ՇՀԱՊՁԲ-15/10-ՀՀ ՊՆ ՆՏԱԴ-ՇՀԱՊՁԲ-7/63» ծածկագրով շրջանակային համաձայնագրերի միջոցով գնում

կատարելու ընթացակարգին (այսուհետ՝ նաև Ընթացակարգ) մասնակցության հայտ է ներկայացրել «Ֆիրմա Լիդա» ՍՊԸ-ն:

Ընկերության կողմից ներկայացրած հայտը հանձնաժողովի կողմից 29.05.2017թ. թիվ 4 արձանագրությամբ մերժվել է հայտը ներկայացնելուն համապատասխան հաշվետու տարվա ընթացքում պարտավորությունների հաշվեկշռային արժեքը ակտիվների հաշվեկշռային արժեքը գերազանցելու հիմնավորմամբ:

Ընկերությունը ընթացակարգին մասնակցելու նպատակով ներկայացված հայտի N 3.3 հավելվածով՝ հրավերով սահմանված ֆինանսական միջոցների մասին հայտարարությամբ, հայտնել և հավաստել է, որ «ԳԱԿ-ՇՀԱՊՁԲ-15/10-ՀՀ ՊՆ ՆՏԱԴ-ՇՀԱՊՁԲ-7/63» ծածկագրով շրջանակային համաձայնագրերի միջոցով գնում կատարելու ընթացակարգի հայտը ներկայացնելուն նախորդող՝

ա) երեք հաշվետու տարիների համախառն եկամուտի հանրագումարը պակաս չէ ներկայացված գնային առաջարկից.

բ) հաշվետու տարվա ընթացքում պարտավորությունների հաշվեկշռային արժեքը չի գերազանցել ակտիվների հաշվեկշռային արժեքը:

Խորհրդում 01.08.2017թ. կայացած նիստի ժամանակ «Ֆիրմա Լիդա» ՍՊԸ-ի ներկայացուցիչը հայտնեց, որ 07.06.2017թ. ներկայացրել են 2016թ. շահութահարկի ճշգրտված հաշվարկ, որի արդյունքում Ընկերության կողմից Ընթացակարգին մասնակցելու նպատակով ներկայացված հայտը ներկայացնելուն նախորդող հաշվետու տարվա ընթացքում պարտավորությունների հաշվեկշռային արժեքը չի գերազանցում ակտիվների հաշվեկշռային արժեքը:

Խորհուրդը 04.08.2017թ. հարցում է ներկայացրել ՀՀ ԿԱ պետական եկամուտների կոմիտե՝ խնդրելով վերջինիս տալ եզրակացություն այն մասին, արդյոք Ընկերության հայտը ներկայացնելուն (02.05.2017թ.) նախորդող հաշվետու տարվա ընթացքում պարտավորությունների հաշվեկշռային արժեքը գերազանցել է ակտիվների հաշվեկշռային արժեքը, թե՛ ոչ:

Խորհրդի հարցմանն ի պատասխան 17.08.2017թ. ՀՀ ԿԱ պետական եկամուտների կոմիտեից տրամադրվել է եզրակացություն առ այն, որ «Ֆիրմա Լիդա» ՍՊԸ-ի կողմից հայտը ներկայացնելու (02.05.2017թ.) օրվա դրությամբ նախորդող տարվա ակտիվների հաշվեկշռային արժեքը կազմել է 64.172.681 դրամ, պարտավորությունների հաշվեկշռային արժեքը՝ 91.557.850 դրամ, սակայն հարկ վճարողի կողմից 07.06.2017թ. ներկայացվել է 2016թ. շահութահարկի ճշգրտված հաշվարկ, համաձայն որի ակտիվների հաշվեկշռային

արժեքը կազմում է 64.172.681 դրամ, իսկ պարտավորությունների հաշվեկշռային արժեքը՝ 56.557.850 դրամ:

ՀՀ կառավարության 10.02.2011 թվականի N 168-Ն որոշմամբ հաստատված «Գնումների գործընթացի կազմակերպման մասին» կարգի (այսուհետ՝ Կարգ)

• 47-րդ կետի 1-ին ենթակետի համաձայն՝ հայտերի բացման նիստի ավարտին հաջորդող աշխատանքային օրը հանձնաժողովի քարտուղարն էլեկտրոնային եղանակով Հայաստանի Հանրապետության կառավարությանն առընթեր պետական եկամուտների կոմիտե հարցում է ներկայացնում առաջին և հաջորդաբար տեղ զբաղեցրած մասնակիցների՝ Հայաստանի Հանրապետության պետական բյուջեի նկատմամբ հայտը ներկայացնելու օրվա դրությամբ ժամկետանց հարկային պարտավորությունների, ինչպես նաև նույն կարգի 67-րդ կետով նախատեսված որակավորման պահանջի առկայության վերաբերյալ՝ ներկայացնելով հարկ վճարողի հաշվառման համարը:

• 48-րդ կետի համաձայն՝ Հայաստանի Հանրապետության կառավարությանն առընթեր պետական եկամուտների կոմիտեն նույն կարգի 47-րդ կետի 1-ին ենթակետով նախատեսված հարցումն ստանալու օրվան հաջորդող երեք աշխատանքային օրվա ընթացքում էլեկտրոնային եղանակով պատվիրատուին տրամադրում է հարցման մասին եզրակացություն: Եթե տրամադրված եզրակացության արդյունքում մասնակցի ներկայացրած հայտարարությունները որակվում են իրականությանը չհամապատասխանող, ապա՝

1) հայտերի գնահատման արդյունքների հրապարակման նիստում հանձնաժողովի որոշմամբ տվյալ մասնակցի հայտը մերժվում է, և

2) այդ մասնակցի տվյալները գնման գործընթացին մասնակցելու իրավունք չունեցող մասնակիցների ցուցակում ներառելու գործընթաց նախաձեռնելու նպատակով ի հայտ եկած հանգամանքների մասին տեղեկությունները պատվիրատուի կողմից ուղարկվում են Հայաստանի Հանրապետության ֆինանսների նախարարություն՝ դրանց ի հայտ գալու օրվան հաջորդող երեք աշխատանքային օրվա ընթացքում:

• 67-րդ կետի 1-ին ենթակետի համաձայն՝ մասնակիցների՝ օրենքի 5-րդ հոդվածի 3-րդ մասի 4-րդ կետով նախատեսված՝ «Ֆինանսական միջոցներ» չափանիշը գնահատվում է հետևյալ կարգով՝ հրավերով պահանջվում է, որ Հայաստանի Հանրապետության ռեզիդենտ հանդիսացող մասնակիցը, բացառությամբ անհատ ձեռնարկատեր չհանդիսացող ֆիզիկական անձի, իր հայտով ներկայացնում է հայտարարություն այն մասին, որ իր կողմից հայտը ներկայացվելուն նախորդող՝

ա. երեք հաշվետու տարիների համախառն եկամտի հանրագումարը պակաս չէ ներկայացված գնային առաջարկից.

բ. հաշվետու տարվա ընթացքում պարտավորությունների հաշվեկշռային արժեքը չի գերազանցել ակտիվների հաշվեկշռային արժեքը.

Նույն կետի 3-րդ ենթակետի համաձայն՝ մասնակցի որակավորումը գնահատվում է բավարար, եթե վերջինս ապահովում է սույն կետով նախատեսված պահանջները:

• 70-րդ կետի համաձայն՝ մասնակիցն իրեն ներկայացված պահանջների համապատասխանության հիմնավորման նպատակով կարող է ներկայացնել լրացուցիչ այլ փաստաթղթեր, տեղեկություններ և նյութեր:

Հրավերի 7.5 կետի 2-րդ ենթակետի համաձայն՝ գնահատող հանձնաժողովի քարտուղարը հայտերի բացման նիստի ավարտին հաջորդող աշխատանքային օրը էլեկտրոնային եղանակով Հայաստանի Հանրապետության կառավարությանն առընթեր պետական եկամուտների կոմիտե հարցում է ներկայացնում առաջին և երկրորդ տեղ զբաղեցրած Մասնակիցների՝ Հայաստանի Հանրապետության պետական բյուջեի նկատմամբ հայտը ներկայացնելու օրվա դրությամբ ժամկետանց հարկային պարտավորությունների, ինչպես նաև նույն հրավերի 2.3 կետի «Ֆինանսական միջոցներ» որակավորման չափանիշին վերաբերող պարբերությամբ նախատեսված որակավորման պահանջի առկայության վերաբերյալ՝ ներկայացնելով հարկ վճարողի հաշվառման համարը, ընդ որում նշված հարցումն ուղարկվում է Ashkhen_Papoyan@taxservice.am էլեկտրոնային փոստի հասցեին նույն հրավերի 7-րդ հավելվածով նախատեսված ձևին համապատասխան՝ էլեկտրոնային նամակի պատճենները միաժամանակ ուղարկելով Lusine_Ghahramanyan@taxservice.am և procurement@minfin.am էլեկտրոնային փոստի հասցեներին.

Հրավերի 7.6 կետի համաձայն՝ Հայաստանի Հանրապետության կառավարությանն առընթեր պետական եկամուտների կոմիտեն սույն հրավերի 7.5 կետի 2-րդ ենթակետով նախատեսված հարցումն ստանալու օրվան հաջորդող երեք աշխատանքային օրվա ընթացքում էլեկտրոնային եղանակով Պատվիրատուին տրամադրում է հարցման մասին սույն հրավերի 8-րդ հավելվածով նախատեսված ձևին համապատասխան եզրակացություն: Նույն կետով սահմանված ժամկետում Հայաստանի Հանրապետության կառավարությանն առընթեր պետական եկամուտների կոմիտենից եզրակացության չստացման դեպքում Մասնակցի ներկայացրած հայտարարությունը համարվում է իրականությանը համապատասխանող: Եթե տրամադրված եզրակացության արդյունքում

Մասնակցի ներկայացրած հայտարարությունը՝ Հայաստանի Հանրապետության պետական բյուջեի նկատմամբ ժամկետանց հարկային պարտավորություններ չունենալու մասով, որակվում է իրականությանը չհամապատասխանող, ապա՝

1) հայտերի գնահատման արդյունքների հրապարակման նիստում հանձնաժողովի որոշմամբ տվյալ Մասնակցի հայտը մերժվում է, և

2) այդ Մասնակցի տվյալները գնման գործընթացին մասնակցելու իրավունք չունեցող մասնակիցների ցուցակում ներառելու գործընթաց նախաձեռնելու նպատակով ի հայտ եկած հանգամանքների մասին տեղեկությունները Պատվիրատուի կողմից ուղարկվում են Հայաստանի Հանրապետության ֆինանսների նախարարություն՝ դրանց ի հայտ գալու օրվան հաջորդող երեք աշխատանքային օրվա ընթացքում:

Այսպիսով, Խորհուրդն արձանագրում է, որ «Ֆիրմա Լիդա» ՍՊԸ-ի կողմից հայտը ներկայացնելուն նախորդող հաշվետու տարվա ընթացքում պարտավորությունների հաշվեկշռային արժեքը չի գերազանցել ակտիվների հաշվեկշռային արժեքը:

«Գնումների մասին» ՀՀ օրենքի (այսուհետ նաև՝ Օրենք)՝

- 5-րդ հոդվածի 1-ին մասի 4-րդ կետի «բ» ենթակետի համաձայն՝ մասնակիցն ընդգրկվում է գնումների գործընթացին մասնակցելու իրավունք չունեցող մասնակիցների ցուցակում, եթե հայտը ներկայացնելու պահին նախորդող տարվա ընթացքում գնման գործընթացի շրջանակում ներկայացրել է կեղծ տվյալ:

- 3-րդ մասի 4-րդ կետի համաձայն՝ մասնակիցը պետք է բավարարի հրավերով սահմանված որակավորման չափանիշները: Մասնակիցը պետք է ունենա պայմանագրով նախատեսված պարտավորությունների կատարման համար հրավերով պահանջվող ֆինանսական միջոցներ:

- 31-րդ հոդվածի 1-ին մասի համաձայն՝ հայտերը գնահատվում են հրավերով սահմանված կարգով: Բավարար են գնահատվում հրավերով նախատեսված պայմաններին համապատասխանող հայտերը, հակառակ դեպքում հայտերը գնահատվում են անբավարար և մերժվում են:

Այսպիսով, Խորհուրդն արձանագրում է, որ «Ֆիրմա Լիդա» ՍՊԸ-ի կողմից հայտը ներկայացվելուն նախորդող հաշվետու տարվա ընթացքում Ընկերության պարտավորությունների հաշվեկշռային արժեքը չի գերազանցել ակտիվների հաշվեկշռային արժեքը:

Խորհուրդն արձանագրում է նաև, որ Հանաձնաժողովը, Ընկերության հայտը Կոմիտեի կողմից 23.05.2017թ. տրված տեղեկանք-եզրակացության հիման վրա մերժելով՝

գործել է իրավաչափ, սակայն խորհուրդը հիմք ընդունելով Կարգի 70-րդ կետով սահմանված պահանջները և Կոմիտեի կողմից 17.08.2017թ. տրամադրված եզրակացությունը, գտնում է, որ խախտվել է Օրենքի 31-րդ հոդվածի 1-ին մասով և նույն հոդվածի 2-րդ մասի 1)-ին կետով սահմանված պահանջները:

Հաշվի առնելով վերոգրյալը՝ խորհուրդը գտնում է, որ «Ֆիրմա Լիդա» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու հիմքեր առկա չեն:

Ելնելով վերոգրյալից և ղեկավարվելով «Գնումների մասին» ՀՀ օրենքի 48-րդ հոդվածի 6-րդ մասի 7-րդ կետով՝ ՀՀ գնումների բողոքարկման խորհուրդը

Ո Ր Ո Շ Ե Ց

ՀՀ ֆինանսների նախարարության կողմից 15.06.2017թ. թիվ 03/26-1/10810-17 գրությամբ «Ֆիրմա Լիդա» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված պաշտոնական ընթացակարգը մերժել:

ՀՀ գնումների բողոքարկման խորհրդի որոշումն իրավապարտադիր է:

ՀՀ գնումների բողոքարկման խորհրդի որոշումը կարող է բողոքարկվել դատական կարգով:

ՀՀ գնումների բողոքարկման
խորհրդի անդամ՝



ԷՄԻԼ ՍԱՐԳՍՅԱՆ